

Curzio Gennari Daneri fa divagazioni clinico filosofiche e si ricorda dei vecchi medici tipo che non fomentavano certamente i pazienti a diventare degli ipocondriaci e facevano spendere meno alla USL

.....

Dachiindrè , cuànd la medzén'na l'éra ancòrra 'na putén'na
i malè pu che al dotór is metäv'n in màn dal Sgnór.
Una volta i nostor véc.. is metèvon 'dnans al spéc'
e is guardävon il tonsilli e po i sarcävön un bón consilli

e j andävön dal speziär par savér co gh'era da fär,
lu al capiva con n'ociädas' léra 'na roba complicäda
e se as tratäva d'un fardór o sa ghe vräva un bón dotór
che po dopa, a distansa äd n'orètta ... al riväva in biciclètta.

Spèss ...p'r averol zamò visitè l'éra äd ca con al malè
al sajäva il so deblässi e al sajäva il so gramèssi .
l'ordinäva la so cura propria fata acsì par lu su mzura
parchè a sèmma tutt divèrs e scandagnón va pr'al so vèrs

La medzén'na ch' fà par ti l'an va miga bén par mi
e senza averogh troppa sciensa, l'éra a post con la coscienza.
Con la mutua incó i dotór in sàn pu co fär gnàn lór
una vizita in premura po 'na riceta par la cura
e po subitt "su sòtta n'ätor "..... l'iv provè anca vuätor ?

Mo cozéla 'na malattia in ste temp nóv äd frenezia
i gh àn tutti sto morbén äd fär il cozi prést e bén
pr'al fardor penicilina e pr'al mäl äd dent streptomicina
ch'l'é cme mèttor fär 'na lota dand a tutti 'na gran bota

Picär zo con al bastó n sia coj gh' à tort e coj gh'à ragió n
fär cme coll che in t'un cuärt d'ora.. l'à butè la ca sot sóra
e l' à dè fogh ai mataras par masär du scarafas.
Mi son propria un ignorant e pardonim e scusém tant

ridì pur sòtta i barbìz mo aj mé temp e a m'è daviz
cuànd it dävön la to cura is fidävön 'd'là natura
e i lasävön che la freva las tolis al témp ch' agh vräva
gh'è da riddor forsi su parchè adés, nes mora pù?
Con tutt sté curi äd tutt sti mäl as limpissa j ospedäl
e tant incó cme tanta jér, po is limpi'n i simitér
e za tant cme da chi indrè la dedlà a s gh'é sempr'andè
parchè chi.... càra i mé sjori a sèmma tutti provizori.

